

**Immiaaqqat imeruersaatillu qillertuusaniittut Kalaallit Nunaanni tamarmi nioqqutaalersinnaaqqullugillu immiaaqqat imeruersaatillu puui pillugit nalunaarut allanngorteqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaasilluni qillertuusat aamma kalaallit nunaanni utertitsisarnermut ilaalersillugit.**

(Inatsisartunut ilaasortaqaq Nivi Olsen, Demokraatit)

### **Akissuteqaat**

(Pinnngortitamut, Avatangiisinut Ilisimatusarnermullu Naalakkersuisoq)

### **Siullermeerneqarnera**

Naalakkersuisuniit poortuutissanut nalunaarut pillugu Inatsisartut aalajangiiffigisassaattut siunnersuummut saqqummiunneqartumut qujavugut.

Nunarput tamakkerlugu puukunik utertitsisarnermik ingerlalluartumik peqarnissarput, taamaalillunilu atuisut immiaaqqat, sodavandit immaqalu imeruersaatit allat puukuinik utertitsinissamut kajumissuseqarnissaannik qulakkeerinissaq Naalakkersuisut pingaartippaat. Taamaalilluni puukut pinnngortitamut igiinnarneqannginnissaat qulakkeerneqassammat. Utertitsisarnermi ingerlalluartumi puukut imaqaanngitsut atoqqinneqartarnissaat qulakkeerneqassaaq.

Immiaaqqanik sodavandinillu eqqussisarnermi tuniniaasarnermilu ullumikkut “immiaaqqat imeruersaatillu kulsyrimik akullit puui pillugit Namminersornerullutik Oqartussat nalunaarutaat nr. 16, 28. maj 2002-meersoq” tunngavigineqarpoq. Poortuutissanut nalunaarummi §§ 1 aamma 2 naapertorlugit immiaaqqat imeruersaatillu kulsyrimik akullit taamaallaat utertittakkanik, nalunaarummut ilanngussami nassuiaatigineqartunut naammassinniffiusunik, aammalu Kalaallit Nunaata Avannaani Tunumilu poortuutissanik ataasiaannarlugit atorneqartartunik utertitsisarnermi Naalakkersuisunit akuerineqartumi utertinneqarsinnaasunik puullit Kalaallit Nunaata kitaani tuniniarneqarsinnaapput sassaallutigineqarsinnaallutillu. Tassalu ullumikkut puiaasanik plastikkinik utertitsisarnermik ingerlalluartumik atorneqarluartumillu (98,5 procentimik) Kalaallit Nunaanni, kisiannili nuna tamakkerlugu atuutinngitsumik peqarpugut.

Poortuutissanut nalunaarut atuutilermalli nalunaarut iluaqutaasumik immikkoortuni arlalinni pitsannguiffigineqarsinnaasoq ersarissisimavoq, ilaatigut imeruersaatit suut utertitsisarnermut ilaatinneqassanersut eqqarsaatigalugit. Taamatullu utertitsisarneq nuna tamakkerlugu ingerlasinnaasariaqarpoq. Taamaattumik ukiuni kingullerni Naalakkersuisut misissueqqissaarnermik arlalinnik aallartitsisimapput, taakkunanilu utertitseriaaseq maannakkut atorneqartoq kiisalu utertitsisarnerit allat atorneqarsinnaasut misissuiffigineqarput. Misissueqqissaarnerit taakku Kalaallit Nunaanni utertitsisarnermik nutaamik atuutsitsisoqalissanersoq pillugu Naalakkersuisuni aalajangiisoqartussanngorpat tunngavigineqassapput.

Naalakkersuisut ilaatigut utertitsisarnermik nuna tamakkerlugu atuuttussamik nutaamik, qilersorsimannnginnerusumik unammilleqatigiilernissamut ammaassisumik pilersitsisinnaanermut periarfissanik, tamatumalu peqatigisaanik puukut imaqaanngitsut pinnngortitamut igiinnarneqartannginnissaannut qulakkeeriffiusunik misissueqqissaarput.

Misissueqqissaarnermi periarfissatut ilusiliat ilaanni imeruusaatit puuunik, immiaaqqanut, imeruusaatinut, imermut, imeruusaatinut eqeersaatitalinnut, viinninut imigassanullu atorneqartunik igalaaminernik, saviminernik plastikkinillu utertitsisarneq, ilaatigut Islandimi utertitsisarneq isumassarsiorfigalugu misissuiffigineqarpoq. Utertitsisarnermi tassani imeruusaatit qillertuusanik poorlugit tunineqartut ilaatinneqarput.

Misissuinerit kingulliit naammassineqarnissaat Naalackersuisunit utaqqineqarpoq. Ilaatigut utertitsisarnerup nutaap qanoq ilusilerneqarsinnaanerata, aaqqissuunneqarsinnaanerata ingerlanneqarsinnaaneratalu misissuiffigineqarnissaa amigaatigineqarpoq. Aaqqiissutissaasinnaasut nutaat aamma atorneqarnerminni ingerlalluarnissaat pingaaruteqarpoq. Ilaatigut atortut pisariaqartinneqartut pisiarineqartussaapput aaqqissuussaannermillu utertitsisarnermik ingerlatsiviusinnaasumik pilersitsisoqarnissaa pisariaqarluni.

Naalackersuisut utertitsisarnermik nutaamik atulersitsiniarlutik aalajangiippata, aamma inuussutissarsiutinik ingerlataqartut utertitsisarnermik nutaamik pilersitsinissamut allannguissamullu periarfissaqartillugit piffissaliisoqassaaq.

Naalackersuisuniit taamatut oqaaseqarluta allannguutissatut siunnersuut una akuerisassanngorlugu inassutigaarput.

**Allannguutissatut siunnersuut: Naalackersuisut UPA2020-mi misissueqqissaarnermik, puukunik utertitseriaatsimik nuna tamakkerlugu atuuttumik naleqquttumillu aaqqissuussinissamut ingerlatsinissamullu, tassungalu ilanngullugu utertitseriaatsimik atuilernissamut piffissamut pilersaarutissamut inassuteqaatinik saqqummiussiviusumik agguaassinissamut peqquneqarnissaannik Inatsisartut aalajangiiffigisassaattut siunnersuut.**